



12. august 2011

UKA 2011/89

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Motorcykeliliniq eqqusseqqusseqqusaannginnerup atorunnaarsinneqarnissaanut naalackersuisut sulissuteqarnissaannut inatsisartut aalajangiiffigisassaattut siunnersuut.
(Inatsisartuni ilaasortat Knud Kristiansen og Siverth K. Heilmann, Atassut)

Tunngavilersuut:

1. juli 1980 kingorna motorcykeliliniq nunatsinnut eqqussisoqaqqusaanngilaq. Inatsisini nunatsinnut atuttuni nr. 186 14. maj 1980 allassimavoq, eqqussisoqaranilu motorcykeliliniq sanaqqusaanngitsoq. Eqqusseqqusiunnaarnermut maluginiagassatut ilanngunneqarsimavoq, naliginnaasumik sukkassuseq illoqarfiup iluani atuuttoq akunnermut 40 k/m malinneqanngingajalluinnarsimasoq, taamattumillu sukkavallaamik mianersuaatsumillu ingerlaarnerit motorcykeliliniq ingerlatsisumut angallattunullu allanut navialatitsisinnaasut pisarsimasut.

Atassut-mit soqutigisarivarput innuttaasut namminneerlutit toqqangassaqartuarnissaat, taamaattumillu eqqusseqqusinnginneq isumaqatiginagu. Atassut-mit isumaqarpugut politikeritut killilersuinikkut innuttaasut nammineq toqqaasinnaanerit killilersussanngikkippat taamaattorli innuttaasut nammineerlutik akisussaaffigissagaat nammineq iliuutsitik.

Eqqusseqqusiunnaarnermi tunngavilersuutigineqarsimavoq motocykeliliniq ingerlatitsisut mianersuaattumik ingerlaartarsimanerat. Nunatsinni qamuterallannik ingerlaarsinnaaneq akuerisaavoq, taakkualu aamma motorcykilitulli sukkasoorujussuarmik ingerlaarsinnaapput. Innuttaasut ajornartorsiutaanngitsumik qamuterallannik ingerlatsisinnapput, taamaattumik isumaqarpugut ajornartorsiutaanngitsumik motorcykeliliniq aamma ingerlatsisinnaasut. Maluginiarsimavarputtaaq motorcykeliliniq nunatsinni angallateqarsinnaaneq inerteqqutaanngitsoq eqqusseqqusiunnaarnerneq sioqqullugu nunatsinut eqqunneqarsimasunik, tamannalu angallannermi sillimaniarnermut oqartussanit ernumanartutut isigineqarsimanngitsoq.

Sukkalisaartoqarsinnaanera mianersuaattumillu ingerlaartoqarsinnaanera aallaqqaataaniit killilerneqarsinnaavoq motorcykilit eqqunneqarsinnaasut motooriisa angissusaasa 250cc-mut killilerneratigut, 2000cc tikillugu pissarsiarineqarsinnaangaluartut. Naak 250cc-mik motorillit sukkasuumik ingerlaarsinnaangaluartut killiliinikkut suli sukkanerusumik ingerlaartoqarsinnaanera pakkersimaarneqarsinnaavoq. Saniatigut eqqarsaatigaarput angallannermut maleruaqqusatigut piumasaqaatigineqarsinnaasoq motorcykeliliniq ingerlatsinaraanni 25-nik ukioqalereersimanissaq, qaammatinilu aalajangersimasuniinnaq motorcykeliliniq ingerlaartoqarsinnaasassasoq. Taakkuli taasagut siunnersuutaannaapput Naalackersuisut nalilersuinissaannut qiviarneqarsinnaasut, eqqusseqqusiunnaanngikkaluarlunimi ajornartorsiutaasimasut allatut aaqqinneqarsinnaammata.

Pisortanut aningaasatigut allaffissornikkullu kingunerisassai:

Toqqaannartumik pisortanut aningaasatigut allaffissornikkullu aningaasatigut kinguneqarnaviannigilaq. Motorcykelilli nunatsinni amerlinerisigut isertitarineqartut

amerlisinnaapput aqqusinnermut akiliutaasartutitgut. Motorcykilinut akiliutigineqartartoq maanna ukiumut 3.540 koruuniuvoq.

Eqqusseqqusiunnaarnerullu atorunnaarsinneratigut eqqussinnermi akitsuutit ilanngunneqassapput. Eqqussinnermi akitsuutissaq ataasiakkaarlugit tikisinneratut akitsuuserneqarsinnaavoq (soorlu qamuterallannut tamanna atuuttoq) imaluunniit pisarinerini nalinga aallaavigalugu (tamanna biilinut atuuppoq). Qamuterallannut eqqussinnermi akitsuut maanna 22.000 koruuniuvoq.

Inatsisip nr. 186 14. maj 1980-imeersup atorunnaarsinnissaanut allangortinnissaanulluunniit atatillugu nunatsinnut annertunerusumik aningaasartuutaanaviangilaq ilatsit qallunaat naalangaaffianiittuummat. Naalakkersuisut qallunaat naalagaaffiannut isumaqatigiinniarniassapput inatsisip allangortinneqarnissaanut atorunnaarsinneqarnissaanulluunniit, kiisalu angallannermi inatsisit Kalaallit Nunaannut atuuttut allangortinnissaanut, tamanna Naalakkersuisut pisariaqartutut nalilissappasuk.

Eqqusseqqusaannginnerup atorunnaarsinnerani sulissuteqartoqassaaq eqqussinnermi akitsuutinut Inatsisartut Inatsisiliaasa allangortinnissaannut.

Siunnersuutit piviusunngortinnissaanut allaffissornikkut naammassineqarsinnaanera naatsorsuutigaarput ukiup affaanik sivisussuseqassasoq, piviusunngortinnissaanut suliassaassapput, qallunaat naalakkersuisuinik isumaqatiginninniarnit, eqqussinnermi akitsuutinut Inatsisartut inatsisaanni allangortinnissaanut piareersaatit, tusarniaanerit il.il. Taakkulu allaffeqarfiit annertusineqarnissaannik kinguneqartariaqanngilaq.

Maanna motorcykilinut aqqusinnermut akiliutaasartut inissinneqareernikuupput eqqusseqqusiunnaarnerup sioqqullugu tikisinneqarsimasunut, taamaattumik eqqusseqqusiunnaarnerup atorunnaarsinneqalernerani allaffissornikkut annertunerusumik suliassaqalernissaq kingunerinaviangilaa.

Inuussutissarsiornermut aningaasaqarnikkut allaffissornikkullu kingunerisassai.

Inuussutissarsiortunut aningaasatigut allaffissornikkullu kinguneqarnaviangilaq. Eqqusseqqusinninnerullu atorunnaarsinneratigut tuniniaasunut iluarsaasarfinnullu isaatissutaalissaaq. Saniatigut aamma biilernermit ilinniartitsisartunut isaatitsissutiginnissaanut periarfissaqalissapput motorcykilinut allangartartaarniartut aamma ilinniartitalissagamikkit.

Innuttaasunut aningaasaqarnikkut allaffissornikkullu kingunerisassai.

Innuttaasunut aningaasaqarnikkut allaffissornikkullu kinguneqarnaviangilaq.